

JOXE MARI AUZMENDI HEZKUNTZA BEKAREN

3. DEIALDIA

Sarrera

Deialdi honen helburua Joxe Mari Auzmendiren hezkuntza balioei jarraipena ematea eta hobekuntza pedagogikoa ardatz izango duen ikastetxeen eraldaketan eragiteko oinarriak ipintzea izango da.

Joxe Mari Auzmendik euskararen eta euskal kulturaren, hobekuntza pedagogikoaren, herri hezitzailearen eta inklusioaren inguruan ardatsu zuen bere ibilbidea: "Hezkuntzak ekarriko du gizarte hobe bat, gizarte justuago bat, orekatuago bat, parekideago eta euskaldunago bat. Baina hezkuntzak eginkizun handi hori beteko badu, bikaina, kalitatekoa izan behar du".

Ikerlariei, pedagogoei, hezitzaile taldeei edota ikastetxeei zuzenduriko beka hau Joxe Mari Auzmendik sortu eta gidatu zuen Hik Hasi egitasmoak sustatzen du eta Hernaniko Udalak diruz laguntzen.

1. XEDEA

Euskal Herriko ikastetxeek, gaur egungo erronka sozial, etiko, teknologiko, pedagogiko eta abarrei erantzuteko, eraldaketa prozesuak egitea beharrezkoa dute. Eraldaketak marko teoriko eta bide-orri metodologikoa behar ditu. **Beka honen helburua, ikastetxeen beharrei erantzungo dien ikerketa eta azterketa egin ostean, eraldaketa prozesuan lagunduko duten oinarri teorikoak, metodologikoak eta praktikoak proposatzea izango da. Horrela, etengabeko hobekuntzarako bidean, beka honen emaitzak Euskal Herriko ikastetxe guztientzat lagungarria izan daitekeen material bat proposatuko du, orientagarria, iradokitzailea eta praktikoak, hain zuzen ere, horren gainean, ikastetxe bakoitzak bere prozesua egin dezan ondoren.**

Lan honek, Joxe Mari Auzmendik bere ibilbidean landu zituen hezkuntza balioak ere jaso beharko ditu:

➤ Hobekuntza pedagogikoa

Gizartea aldatzen doan neurrian aldatzen da hezkuntza ere. Hezkuntza-berrikuntza funtsezkoa da gizarte batentzat, iraganeko gaizki-eginak gainditu eta etorkizun hobe bat eraikitzeko bidean.

➤ Euskara eta euskal kulturaren biziberritzea

Euskararen erabilera bultzatzeko eta indartzeko eta euskal kulturaren transmisioa sustatzeko ekimenak izatea. Haur eta gazteen eleaniztasuna sustatzeko bidea euskararen eskutik egitea da helburua, euskara eta euskal kultura bizitzarako tresna eraginkor bihurtuz.

➤ Herri hezitzailea

Jolasa eta sormena ikasteko eta garatzeko tresnatzat dituen haurren kultura aitorturik, haurrei benetako parte hartzea eta erabakitze ahalmena ematea. Haurrek beraiek eraikitako aisi hezitzailearen eta euskaldunaren bitartez, aniztasunean berdinak eta parekideak izanez, eta ingurumen naturala eta kulturala zainduz, komunitate-sarea eta auzolana indartzea da herri hezitzailearen helburua, pertsonen arteko harreman osasuntsuak, justuak eta asegarriak jostea.

➤ Inklusioa

Guztiontzat beharko lukeen herri inklusiboa eraikitzeko, oso garrantzitsua da izaera bereziko gaiak lantzen dituzten haurren eta familien ongizatea eta balioa aitortzea eta ikusaraztea. Elkarte, haur eta familia horiek transmititzen dituzten balioak jaso behar ditu hezkuntza-komunitateak, gizarte moduan aberasteko eta hezteko.

2. IRAUPENA ETA ZENBATEKOA

Bekaren iraupena urte eta erdikoa izango da (2027ko uztaila artekoa).
Bekaren zenbatekoa 12.000 eurokoa izango da.

3. HIZKUNTZA

Proiektua euskaraz landuko, idatziko eta aurkeztuko da.

4. ONURADUNAK

Euskal Herrian Hezkuntza-hobekuntzan dabiltzan ikerlariak, pedagogoak, hezitzaile taldeak, ikastetxeak edota unibertsitateak.

5. ESKAERA EGITEKO EPEA ETA LEKUA

Proposamenak aurkezteko epea 2025eko abenduaren 1ean amaituko da eta epaimahaiak, aurkeztutako lanak aztertu ostean, 2026ko urtarrilaren 8an jakinaraziko du saritutako proiektua zein den.

Dokumentazio guztia gutunazal batean sartuta honako helbide honetara bidali beharko da: Hik Hasi bulegoa, Errekalde hiribidea 59, Aguila eraikina 1-1 solairua, 20018 Donostia, honako izenburua jarrita: *Joxe Mari Auzmendi hezkuntza bekaren hirugarren deialdia*.

Aurkeztu beharreko dokumentazio guztia digitalki ere aurkeztu daiteke, fisikoki aurkeztu beharrean. Kasu horretan, dokumentu guztiak PDF bihurtu, karpeta bakar batean bildu, eta posta elektronikoz bidali beharko dira honako helbidera: jmauzmendibeka@hikhasi.eus.

Aurkeztutako dokumentazioa osatu gabe balego edo oinarri hauetan eskatutako baldintzak beteko ez balira, interesdunek hiru eguneko epea izango dute dokumentazioa zuzentzeko edo osatzeko. Hala egin ezean, eskatzaileak atzera egin duela ulertuko da.

6. ESKAERA EGITEKO DOKUMENTAZIOA

Parte hartu ahal izateko honako dokumentazioa aurkeztu beharko da:

- Eskaera-orria (I. eranskina) behar bezala beteta.
- Proiektuaren nondik-norakoa: izenburua, azalpena, helburuak, lan-lerroak, metodologia, aurrekontua eta lan-plana.
- Parte-hartzaileen ibilbidea.

Hori guztia gehienez 10 orrialdetan jaso behar da (DIN A-4 formatua, 12 tamainako hizkia eta ohiko tartea).

7. EPAIMAHAIA ETA IRIZPIDEAK

Lau izango dira aurkeztutako lanak aztertuko dituen epaimahaiko kideak: Hernaniko udalaren ordezkari bat eta Hik Hasi egitasmoko hiru hezkuntza-aditu.

Epaimahaiak proiektuak ebaluatzeko eta hautatzeko, irizpide hauek hartuko ditu kontuan:

- Beka honen helburuekin bat egitea. Xedea Euskal Herriko ikastetxeei hobekuntza pedagogikoan sakontzeko oinarri teorikoak eta metodologikoak proposatzea izango da. Bekaren bidez egingo den ikerketaren eta proposatuko den bide-orriaren ardatza hobekuntza pedagogikoa izango da, baina zehar-lerro moduan hiru gai hauek ere barne-bildu beharko dituzte ikerketak eta emaitzek: euskara eta euskal kulturaren biziberritzea, herri hezitzailea edota inklusioa.
- Bekaren emaitza ikastetxeentzat erabilgarri izango den tresna bat proposatzea izango da. Tresna horrek, ikastetxeei eraldaketan laguntzea izango du helburu eta lana oinarri zientifiko, pedagogiko eta praktikoz osatu beharko da. Tresna ezein euskarritan argitaratzeko modukoa izan beharko da, izan paperezko argitalpena edo digitala.

8. BEKAREN ORDAINKETA

Ordainketa modu honetan egingo da:

- Onuradunak jasoko duen zenbatekoaren % 40 proiektua hautatzen den une berean emango da.
- Gainerako % 60a bi zatitan ordainduko da onuradunak eta epaimahaiak adostutako epeetan, beti ere beka irauten duen urte eta erdiko epe-mugaren barruan. Ordainketa hauek egin ahal izateko, onuradunak zehaztu egin behar du zer lan egin duen eta zein aurreikuspen eta lan-plan duen hurrengo hilabeteetarako.

9. ONURADUNEN BETEBEHARRAK

Honakoak dira bekaren onuradunak bete beharrekoak:

- Hamar eguneko epean beka onartzen duela jakinaraztea. Aurreikusitako lan-programa ezingo dela bete edo kalitatea ez dela bermatuko jabetuz gero, beka itzultzeko konpromisoa hartzea.
- Bekaren helburuei lotutako lan-programa garatzeko dagozkion jarraipen-saioak egitea epaimahaiko kideekin edota aholkulari pedagogikoarekin.
- Proiektuan aurreikusitako eta jasotako helburuak, metodologia eta lanak garatzeko konpromisoa hartzea.
- Proiektua adierazitako epean entregatzea.